

N istà gran per i picoi: che emozion!

La sociazion Inout, che da l'istà passà sporc l program "Cistà" per joenec dai 12 ai 16 egn, chest an la endreza ence "Istagran" per i bec de le popolare e pruma mesana. Ai 26 de marz la prejentazion

Sozietà - La sociazion de joegn INOUT, en colaborazion coi Comuns de Sèn Jan e Soraga, porta dant per l'istà 2019 l nef projet ISTAGRAN. La neva scomenzadiva de animazion outa a bec dai 6 ai 11 egn la tol l post de l'istà per i bec endrezada per egn dal Comun de Poza, metan dant neve dal pont de veduda del program e di obietives.

Prum gran cambiament l'è l'iscrizion sun dut l temp e no spartida per setemane: i bec enscinuè parteziparà al program de atività dal 1 de messal enscin ai 23 de aost, dal lunesc al vender, da le 9 da bonora fin le 4 domesdi. Demò doi dis en setemana, per chi che volarà, sarà a la leta i animatores anter le 8 e le 9 per far i doeres de le vacanze. La senta de Istagran sarà ence chest an le aule e la palestra de la scola mesana de Poza: aboncont, se l temp



L grop de Cistà 2018 endana na raida sa mont.

permetarà, vegnarà endrezà più che sarà meso atività de fora, sa mont, a l'aria averta. L'organizacion pervedarà l servije de pulmins per ruar da bonora e per se n jir domesdi, descheche l'era ti egn passé, e ence la mensa duc i dis al restorant Le Giare, fora che canche l grop jirà en gita sa mont o foravia e i bec se tolarà dō i crofegn te prossach.

L grop vegnarà sparti aldō de l'età te doi gregn gropes, un con bec picoi da la pruma a la terza de la populara e un con bec da la quarta a la pruma clas de la scola mesana. Le atività vegnarà endrezade aldō di enteresc e de le capacità di bec, con n format che va dō mingol chel che à garatà polito al Cistà 2018, con animatores joegn, gustegoi e engaissé.

Per chel che revarda l sport, no vegnarà proponet demò jech, ma corse con esperc, per ge dar ai bec

l met de emparar valch da nef e de se sproar a se miorar dal pont de veduda fisich. Per 4 lunesc se scambian fora, picoi e gregn fajarà corse de tennis e de nodar. L martesc bonora sarà la di dedicada ai laboratories, che i bec cernarà aldō de si enteresc e che sarà finalisé a la preparazion del spetacol final che serarà sù l projet. De martesc domesdi i bec fajarà enveze atività per cognoscer miec l'ambient, desche orienteering, nordic walking, spazierade tel bosch. L mercol se jirà en gita sa mont, per jir a cognoscer con contie e jeghes val e crepes che ge fasc da corona a noscia val. La jebia, en colaborazion co la Coprativa Le Rais de esperc de l'educazion e psicologs, vegnarà endrezà atività, jeghes e laboratories che ge dajarà l met ai bec de se cognoscer mingol miec.

Le emozion sarà le protagoniste de cheste giornade e ogne setemana a na vida scempia e originala picoi e gregn proarà a descorir e a recognoscer mingol miec sensazion desche la felizità, la paura, la ira, l desgust. L vender sarà la di da marevea, con ogne setemana valch da nef e fora de anter.

L formular per se enscinuar ite a la scomenzadiva, che pel tor ite al mascim 100 bec, l'è desponibol sul sit www.inoutfassa.com. La sera de prejentazion de Istagran 2019 sarà en martesc ai 26 de marz da le 20.30 te sala grana de la Sorastanza de Sèn Jan. Endana pea via ben segur ence le enscinuazion per Cistà, semper dal sit de inout: ence per i joenec chest istà sarà de bele neve, che vegnarà prejentade en domenica ai 31 de marz da le 20.30 te oratorie de Poza.